



Hierscht 2015 hiren Télématique-System soll fonctionnéieren.

Dann ass och vill gefrot ginn: Wéini geet de Chantier un? Ben, et ass virgesinn, datt de Chantier ugeet haaptsächlech an der Gare selwer. D'Quaien, déi sollen ufanks 2016 ufänke gebaut ze ginn. D'Bauzäit vun deem Ganzen ass op fënnf Joer virgesinn. Dat heescht, 2021 bis '22 soll de ganze Projet, dat heescht d'Gare mat de Stroossen, fäerdeg sinn.

Et gëtt och a Phase gebaut. Dat heescht, mir konzentréieren eis natierlech an enger éischter Phas virun allem op d'Gare, well do ass dat Urgentst ze maachen. Ech mengen, et ass vu villen hei gesot ginn, vëlleeg zu Recht, datt am Fong déi Gare Ettelbréck wierklech net méi deem entsprécht, wat haut eng modern Gare muss sinn. Also, ech mengen, ech brauch dat net nach eng Kéier alles ze widderhuelen, wat hei gesot ginn ass.

Dann ass gefrot ginn: Jo, wat geschitt op der Gare während där Zäit vum Chantier? Wat ass mam Parking? Wou ginn d'Maschinen higesat? - Mä duerfir sinn alles Saache virgesinn. Wéinst dem Chantier, wann deen do ass, wäert de Parking da perpendiculaire zu de Gleiser aménagéiert ginn. Woubäi een natierlech ëmmer muss soen: E Chantier vun där doter Envergure, dat ass net, wéi wa kee Chantier do wier. Dat bréngt natierlech Schwieregkeete mat sech.

Ech kommen och herno nach drop zrëck, well och vill Froe gestallt gi sinn iwwert d'Verspéidungen an d'Chantieren en général de Moment bei der CFL, mä et mécht ee jo awer dat Ganzt, fir datt et herno soll besser goen. An ech mengen, et muss een natierlech dat gutt communicuéieren, och sur place, an da mengen ech och, datt d'Leit... Bon, natierlech ass ee genervt, wann et vläicht net gradesou gutt geet während dem Chantier, mä vu datt ee jo weess, datt dat alles gemaach gëtt, fir datt et herno vill besser ass, wéi et haut ass, mengen ech, dann hält een dat och sécherlech mat a Kaf.

An dann d'Maschinen, wou ginn déi hin? Déi ginn an der Cour à marchandises implantéiert, also ofgestallt, wann do soll gebaut ginn.

Dat heescht, et ass schonn dru geduecht ginn, wéi dat Ganzt organiséiert gëtt. Wéi gesot, nach ëmmer mat där Remarque, datt et e Chantier bleibt an datt op engem Chantier net alles normal fonctionnéiert an och sécherlech dat eent oder anert ka virkommen. Mä et soll awer versicht ginn, dat esou gutt a maximal gutt ze organiséieren, datt näischt soll virkommen.

Da sinn och Froe gestallt ginn iwwert dee berühmte verseuchte Buedem an iwwert dee Bunker. Eischstens wëll ech lech soen, et gëtt ëmmer esou gemaach, wéi wann dat deenen net bekannt wär, déi hei solle bauen. Dat stëmmt net! D'Pläng leie ganz kloer der CFL respektiv de Ponts et Chaussées vir, an et ass och genau gewosst, wou dee Bunker ass. An et ass och gewosst, datt et do verseuchte Buedem gëtt. Mä fir awer doraus ze maachen, wéi wann een dee Problem net kéint léisen, jo, dat ass jo awer elo nu wierklech un den Hoer erbäi-gunn.

Natierlech, bei engem verseuchte Buedem huet een ni eng honnertprozenteg Garantie, op wat een herno stéisst. Mä ech soen lech awer, wa mer esou géife rasonéieren, ma dann hätte mer op Belval oder op anere Plaze guer net brauchen unzefänken, eppes ze maachen. Wa mer elo iwwerall higinn, wou mer nëmme mengen, datt verseuchte Buedem wär, a mir soen, mir ginn net méi doru fréckelen, da soen ech lech, da maache mer net méi ganz vill op ville Plazen. Mä et muss jo awer virun allem och dréms goen, grad do, wou industriell Aktivitéiten och scho stattfonnt hunn, datt mer déi erëm hierstellen an datt mer doraus eppes aneschtens maachen, wéi datt mer do de Buedem, dee verseuchte Buedem einfach leie loos-sen.

Ech kréie gesot, datt am Moment op Basis vun deenen Analysen, déi gemaach gi sinn, an et sinn der gemaach ginn, déi Pollutioun do bekannt ass an datt se sech awer a Grenzen hält an, virun allem, datt se maîtrisabel ass. An ech mengen, och dat muss mir duergoen à ce stade, fir datt mer kënnen de Projet ugoen. Wéi gesot, natierlech ëmmer, wann ee bis bei esou Saache buert, kënnen duerchweegs och Iwwerraschunge virkommen. Mä ech mengen awer och, datt déi ze maîtriséiere sinn.

An dat nämlecht gëllt fir dee Bunker. Et ass bekannt, wou en ass, an da muss ee sech esou organiséieren, datt een dat och do maîtriséiert

kritt, an dat ass duerchweegs awer och méiglech.

Dann ass gefrot gi vum Här Turpel: Si Calculle gemaach gi vun der CMT ronderëm dee ganzen Tunnel, dee gebaut gëtt fir d'Autoen? Natierlech, ech mengen, dat hate mer lech an der Kommissioun jo och gewisen, déi ganz CMT-Simulatiounen, déi gi landeswäit gemaach. An natierlech ginn där bei all grouse Projet gemaach ganz genau am Detail, fir ze kucken, wéi d'Fluxe sech entwéckelen ëmmer och mat Pronosticke vun der Verkéiersentwécklung.

Déi si selbstverständlech och hei gemaach ginn. Ech mengen, dee Film, dee gewise ginn ass an deen och um Internet vum Ministère ze kucken ass, dat ass méi eng Gesamtvue, fir einfach ze veranschaulichen, wéi dat herno soll fonctionnéieren. Dat huet elo näischt mat de Simulatiounen direkt ze dinne, mä et sinn natierlech och do Simulatiounen gemaach ginn.

Da stellt d'Fro sech elo vun de Schwieregkeete bei de Bus/Zuch-Korrespondenzen. Et ass och gefrot ginn am Kader vum neien Horaire vun der Nordstreck, dee jo de 14. Dezember elo ugeet, wou mer jo den Hallefstonnentak aféieren, wat jo, dat muss een emol soen, haaptsächlech tëschent Ettelbréck an Elwen eng immens Verbesserung ass. Mir ginn do vum Stonnentak op den Hallefstonnentak. A bei allem, wat ee sécherlech ka kritiséieren, wat nach net fonctionnéiert, ass dat emol eng Verbesserung.

Da bleiwen natierlech, well eng Rei Chantiere sinn, eng Rei Schwieregkeeten op: datt mer zum Beispill och tëschent Ettelbréck a Lëtzebuerg net kënnen an de Spëttestonnen all déi Zich ubidden, déi mer haut ubidden, well et eegleiseg geet op engem klengen Stéck ënnen, wéinst dem Arrêt Pont Rouge, well do jo d'Gleiser mussen ëmgebaut ginn. Mä och do bieten ech ëm Verständnis, well mir maachen dat jo, fir datt herno fir d'Leit vun der Nordstreck en immense Gewënn dobäi erauskënn.

Wann deen Arrêt bis fäerdeg ass, an dat ass eben nach eng batter Zäit, vläicht zwee, zwee an en halleft Joer, da wënnt een, wann een op de Kierchbiereg fiert, bis zu 20 Minutte Fahrzäit par rapport zu haut. Ech mengen, dat gëtt eng immens Steigerung vum öffentliche Transport. An dat nämlecht betrëfft natierlech de Busréseau.

Mäi Ministère gëtt haut nach e Communiqué eraus, wéi de Busréseau...

► **M. Mars Di Bartolomeo, Président.**- Dir misst esou lues zur Konklusioun kommen.

► **M. François Bausch, Ministre du Développement durable et des Infrastructures.**- Här President, ech sinn direkt fäerdeg. Nach just ee Saz, wann Der erlaabt, ech sinn amgaangen.

Mir hu misse 70 Buslinnen op der ganzer Nordstreck reorganiséiere wéinst dem Takt, deen elo agefouert ginn ass. Mir wäerten haut och e Communiqué erausginn, wou mer dat kuerz erklären. An op dem Site www.mddi.lu gesäit ee genau, wat fir eng Linn datt dat ass.

An et ass versicht ginn, natierlech dee Bus esou ze organiséieren op den Hallefstonnentak, datt d'Korrespondenze mat de Fluxen an der Richtung fonctionnéieren. Dat heescht, an de Spëttestonnen, wou jo alles da Richtung éischer Stad oder Ettelbréck fiert, datt do d'Buskorrespondenz klappt a Richtung vun do, wou d'Leit wëlle fueren, respektiv owes, wann et erausgeet, d'nämlecht. Dat heescht, mir wäerten et och observéieren, dat steet och am Communiqué dran, déi nächst zwee, dräi Méint, an do, wou mer Reklamatiounen kréien, do, wou muss nogebessert ginn, gëtt selbstverständlech nogebessert.

Dir kënnst lech jo virstellen, wann een den Hallefstonnentak aféiert an et muss ee 70 Linnen dorobber upassen, dat ass natierlech net esou einfach. An do komme sécherlech déi eng oder aner Couack vir, an da wäerte mer déi och da verbessern.

Dann nach e leschte Saz zu deem Communiqué vum Mouvement écologique...

(**Interruption par M. Mars Di Bartolomeo, Président**)

Här President, et sinn immens vill Froe gestallt ginn, ech entschëllege mech derfir. Ech wëll se awer all beäntweren.

De leschte Saz zu deem Communiqué. Et ass nach eng grouss Reform vum RGTR, déi steet jo nach aus souwisou, déi generell Reform, a mir wäerten och higoen an do mat Forume schaffen, Utilisateursforums. Haaptsächlech wäerte mer e Pilotprojet maachen op der Nordstreck, wou mer selbstverständlech dann och kucken, eng Rei Doléancen nach mat ze verschaffen, déi elo nach sécherlech opstinn.

Merci.

► **Une voix.**- Très bien!

► **M. Mars Di Bartolomeo, Président.**- Merci och dem Här Nohaltegkeets- an Infrastrukturminister.

Domat wäre mer um Enn vun der Diskussioun ukomm a mir géifen iwwert de Projet fir déi nei Ettelbrécker Gare ofstëmmen.

Vote sur l'ensemble du projet de loi 6734 et dispense du second vote constitutionnel

Et ass de Projet 6734 an d'Ofstëmmung huet ugefaangen.

(**Interruptions**)

Jo, do schéngt eppes net ze klappen. Jo, ech ka selwer net ofstëmmen.

(**Interruptions**)

Et schénge 60 Leit ofgestëmmt ze hunn, also ginn ech dovunner aus...

► **M. Gast Gibéryen (ADR).**- Neen, ech stëmme hei esou of wéi déi gréng zu Ettelbréck am Gemengerot.

(**Hilarité**)

► **M. Mars Di Bartolomeo, Président.**- Sou, wann ech gelift, mir sinn hei bei der Ofstëmmung. Ech kucken emol...

(**Interruptions et hilarité**)

57 Jo an 3 Neen. Mir kucken nach eng Kéier d'Ofstëmmung genee no, well et schéngt iergendeppes awer net esou honnertprozenteg geklappt ze hunn.

Ont voté oui: Mmes Diane Adehm, Sylvie Andrich-Duval, Nancy Arendt (par M. Laurent Mosar), MM. Emile Eicher, Félix Eischen, Léon Gloden, Jean-Marie Halsdorf, Mmes Martine Hansen, Françoise Hetto-Gaasch, MM. Aly Kaes, Marc Lies, Mme Martine Mergen, M. Paul-Henri Meyers, Mme Octavie Modert, MM. Laurent Mosar, Marcel Oberweis, Gilles Roth, Marco Schank (par M. Marcel Oberweis), Marc Spautz (par M. Paul-Henri Meyers), Serge Wilmes, Claude Wiseler, Michel Wolter et Laurent Zeimet (par M. Serge Wilmes);

MM. Marc Angel, Frank Arndt, Alex Bodry, Mmes Taina Bofferding, Tess Burton, M. Yves Cruchten, Mme Claudia Dall'Agnol, MM. Mars Di Bartolomeo, Georges Engel, Franz Fayot, Claude Haagen, Mme Cécile Hemmen et M. Roger Negri;

MM. Guy Arendt, André Bauler (par M. Eugène Berger), Gilles Baum, Mme Simone Beissel, M. Eugène Berger, Mme Anne Brasseur (par M. Lex Delles), M. Lex Delles, Mme Joëlle Elvinger, MM. Gusty Graas, Max Hahn, Alexander Krieps (par M. Gusty Graas), Edy Mertens et Mme Lydie Polfer;

MM. Claude Adam, Gérard Anzia, Henri Kox (par M. Claude Adam), Mmes Josée Lorsché, Viviane Loschetter et M. Roberto Traversini;

MM. Justin Turpel et Serge Urbany (par M. Justin Turpel).

Ont voté non: MM. Gast Gibéryen, Fernand Kartheiser et Roy Reding (par M. Gast Gibéryen).

Dat gesot, géif ech d'Chamber nach froen, ob se bereet ass, d'Dispens vum zweete Vote ze ginn.

(**Assentiment**)

Dat ass dann esou décidéiert.

Mir géifen dann zu eiem nächste Punkt vum Ordre du jour iwwergoen, dat ass de Projet 6566. Hei geet et ëm ee grenziwwerschreidenden Austausch vun Informatiounen bei Verkéiersdelikter. An d'Wuert huet direkt fir sech selwer d'Madame Josée Lorsché, Rapportrice.

7. 6566 - Projet de loi facilitant l'échange transfrontalier d'informations concernant les infractions en matière de sécurité routière

Rapport de la Commission du Développement durable

► **Mme Josée Lorsché (déi gréng), rapportrice.**- Merci, Här President. Dir Dammen an Dir Härren, beim Projet de loi 6566 geet et ëm d'Ëmsetzung an déi national Gesetzgebung vun der europäescher Direktiv 2011/82. D'Zil besteet doran, de grenziwwerschreidenden Informationsaustausch a puncto Verkéiersdelikter ze vereinfachen an d'Verkéierssicherheit an Europa ze erhéien.

Den Europäesche Gerichtshaff huet dës Direktiv de 6. Mee 2014 iwwer en Arrêt annulléiert, well se op enger falscher Rechtsgrondlag berout. Dat kënn net oft vir. D'Direktiv beriff sech nämlech op déi internationalen Zusammenaarbecht vun der Police, déi net an direkter Relatioun steet zu der Verkéierspolitik, mä zu der Sécherheitspolitik, déi an en anere Kompetenzberäich fält.

Géint d'Zilsetzung vun der Direktiv huet den Europäesche Gerichtshaff keng Awänn erhuewen, an dat ass dann och de Grond, firwat mir

d'Direktiv trotzdem ëmsetze sollen. Woubäi d'Effete vun der Direktiv bis zu engem Délai vun zwielef Méint nom Arrêt en vigueur solle bleiwen. Laut den Informatiounen, déi ech vum Europadeputéierte Claude Turmes kritt hunn, ass d'Direktiv mëttlerweil iwwerschaafft ginn a wäert Enn Februar virleien. An dee Moment wäerte mir dann och eng Modifikatioun vum Gesetz virhuelen.

Dat virusgeschéckt, kommen ech zum Oflaf vun den Aarbechten an der Kommissioun an och zum Inhalt vum Projet de loi. De Gesetzesprojet ass de 16. Abrëll 2013 scho vum fréieren Nohaltegkeets- an Infrastrukturminister Claude Wiseler déposéiert ginn.

D'Avis vum Statsrot datéiere vum 22. Oktober 2013 a vum 3. Juni 2014. Déi verschidden Avis vum der Chambre de Commerce an der Chambre des Métiers datéiere vum 3. Juni 2013, 17. Juli 2013 an 19. Juni 2014. Déi zwee Avis vum der Commission nationale pour la protection des données si vum 25. Juli 2013 a vum 19. Juni 2014. Dir gesitt, datt vill Avisen heizou erakoumen.

Den 10. Februar 2014 huet d'Kommissioun mech als Rapportrice designéiert. Den 23. Abrëll 2014 huet d'Kommissioun de Projet de loi an den Avis vum Statsrot ënnert d'Lupp geholl an huet eng Rei vu parlamentareschen Amendementer formuléiert.

Nodeems d'Nohaltegkeetskommissioun iwwer eng europäesch Kommunikatioun informéiert ginn ass, datt d'Direktiv trotz hirer Annulatioun misst ëmgesat ginn - mir waren eis um Ufank net esou sécher -, hu mir eis den 8. Oktober 2014 mam Avis complémentaire vum Statsrot befaast an hunn de virleienenden Text schlussendlech zrëckbehalen. De 26. November 2014 huet d'Kommissioun mäi Rapport dann eestëmmeg ugeholl.

Ech kommen zum konkreten Deel. Konkret geet et ëm d'Verbesserung vum Informationsaustausch tëschent de Memberstaten am Fall, wou eng Verkéiersinfarkioun an engem anere Land stattfënnt wéi an deem vun der Immatriculatioun vum Véhicule. Och Dréttstate kënnen sech un deem Informationsaustausch bedeelegen, wa se déi néideg Konditiounen erfüllen. Bis elo ass et esou, datt déi entspreichend Verkéiersinfarkiounen oft net mat Geldstrofen oder penale Sanktiounen kënnen beluecht ginn, ganz einfach, well de Besëtzer vum Gefier net ze identifzéieren ass. D'Informatiounen sinn dann dee Moment net ofruffbar.

Obscho vill Efforte gemaach gi sinn, fir d'Zusammenaarbecht um europäeschen Niveau ze verstärken, ass ebe just de Volet vun der Verkéierssicherheit vernoléissegt ginn. Och am Beräich vun der Verkéierssicherheit, kann ee soen, si verschidde bilateral Ofkommensen ofgeschloss ginn, respektiv och regional Ofkommensen, mä déi haten natierlech ëmmer nëmmen eng limitéiert Envergure, well de ganzen europäeschen Territoire net erfaasst ginn ass.

Mam Projet de loi vun haut soll de géigesäitegen Accès zu den Datebanken a puncto Immatriculatioun assuréiert ginn, fir de Propriétaire vum Véhicule och am Ausland dann eben ze identifzéieren. D'Opportunitéit vun der Pour-suite an d'Exekutioun vun der Sanktioun fält duerno an d'Kompetenz vun deem Stat, an deem d'Infarkioun begaange ginn ass an entsprécht der Legislatioun vun deem betraffene Land.

Dee Moment, wou den Numm an d'Adress vum soupçonéierten Auteur vun der Infarkioun bekannt sinn, gëtt hien oder si - d'Frae loosser der bekanntlech manner fléien am Verkéier - an der offizieller Sprooch vu sengem Heemechtsland iwwert d'Sanktiounen an déi juristeschen Konsequenzen informéiert, déi am Land vun der Infarkioun en vigueur sinn.

Den Ofuff vum den Daten erfollegt iwwert den europäesche System EUCARIS, den European Car and Driving License Information System, deen hei am Land 2004 en place gesat ginn ass. Den Accès zu den Daten ass dem sougenannten „Point de contact national“ virbehalen. Déi protokolléiert Date gi fir eng Dauer vu sechs Méint oprechterhalen an därer vum Empfängerstat nëmme benotzt ginn, fir de schëllege Chauffeur ze ermëttelen. Am Fall, wou déi ugeschriwwen Persoun de Verkéiersdelikt contestéiert, muss si sech un de Parquet wenden, fir eng Enquête an d'Wee ze leeden.

D'Direktiv, ëm déi et haut geet, harmoniséiert also weder d'Zort vun den Infarkiounen nach déi jeeweileg Sanktiounen, déi an de Memberstaten applizéiert ginn. Ennert d'Applikatioun vum Gesetz falen all Infarkiounen, déi eng grouss Gefor fir d'Verkéierssicherheit duerstellen. Déi kennt Der alleguer, dat sinn: d'Geschwindegekeetsiwwerschreidung, d'Netdroe vum Sécherheitsgurt respektiv och d'Netdroe vum Casque um Motorrad, d'Duerchfuere vun enger roudier Luucht, d'Fueren ënnert dem Afloss vun Drogen oder Alkohol, d'Fueren op



enger Strooss oder enger Fuerbunn, déi fir den Trafic verbueden ass. Dann awer och d'Benotze vun engem portablen Telefon oder vun engem anere Kommunikatiounsmëttel während dem Fueren.

Ech sinn da scho beim Statsrot, deen awer ganz vill ze soen hat dës Kéier. En huet eng ganz Rei redaktionell a juristesche Inkohärenze festgestallt, op déi ech am Commentaire des articles vu mengem Schrëttleche Rapport am Detail agaange sinn. Wéinst der Zäit ass et wierklech net méiglech, hei op all Detail anzugeen. Et waren der eng Hällewull. D'Kommissioun huet de Recommandatioun vum Statsrot gréisstendeels Rechnung gedroen, mä net grad ëmmer.

Déi wichtegst Punkten, déi an deem Kontext zur Diskussioun stoungen, wéilt ech just kurz resüméieren: Bei der Definitioun vum obligatoreschen Point de contact national, deen den Informationsaustausch am jeeweilege Land soll assureieren, huet de Statsrot proposéiert, de Service Opérations et Prévention vun der Police an d'Gesetz anzuschreiwen. D'Kommissioun war sech wuel eens, der Police dës Kompetenz zouschreiwen, huet awer decidéiert, kee bestëmmte Service iwwert d'Gesetz ze designéieren. Dës ebe just, fir ze verhënneren, datt eng Neiorganisatioun vun der Police zu enger Modifikatioun vum Gesetz misst féieren.

De Statsrot huet dann och drop higewisen, datt Groussbritannien, Irland an Dänemark net un d'Direktiv gebonne sinn. Dat, well déi Länner sech net un der Coopération policière beedelegen, déi jo an der aktueller Direktiv nach d'Base légale duerstellt. Wann d'Direktiv bis geännert ass, kann et gutt sinn, datt déi Länner dann och wäerten ënnert dës Direktiv falen. Dat heescht, datt Lëtzebuerg keng Informatioun vum deene Länner därëf afuerderen an deene Länner och keng Informatioun brauch weiderzeginn. D'Kommissioun huet och hei den Text an deem Sënn ugepasst.

Ech kéim dann zum Dateschutz, wat e komplexe Volet ass. Hei huet de Statsrot eng Opposition formelle erhuewen, well de Projet de loi sech a sengem ursprüngelechen Text op eng europäesch Kaderdecisioun aus dem Joer 2008 beruff huet, déi de Kampf géint den Terrorismus a géint déi grenziwwerschreidend Kriminalitéit als Objet hat. Lëtzebuerg hat dës Kaderdecisioun awer net ëmgesat, soudatt et e Fehler war, se hei am Text ze nennen. D'Referenz op d'Décision-cadre ass doropshin erausgeholl ginn aus dem Text.

Heizou bleift ze soen, datt de Règlement grand-ducal vum 21.12.2004 et erméiglecht huet, e Fichier vun deene Persounen unzuleeën, déi en Avertissement taxé duerch eng Verkéiersinfraktioun kritt hunn. Déi Verkéiersdelikter, déi mat enger Prisongsstrof verbonne sinn, sinn net vun deem Règlement grand-ducal ofgedeckt, wat d'Commission nationale dozou beweegt huet, eng Kritik auszeüben an deem Sënn, dass eben och deem Volet misst an eiser Gesetzgebung Rechnung gedroe ginn.

A mengem Schrëttleche Rapport fannt Dir weider Prezisiounen zum Projet de loi an zu den eenzelnen Avisen. Wéi gesot, et waren der ganz vill. Generell muss een awer festhalen, datt sämtlech Instanzen d'Transpositioun vun dëser Direktiv guttgehalen hunn an och begréisst hunn.

Ofschléissend wéilt ech der Madame Josiane Pauly aus dem Nohaltegkeetsministère e grouse Merci ausdrécken. Si huet eis auszeechent beroden, wat de juristesche Volet ubelaangt, an doduerch si mer dann och mat dëser schwiereger Matière duerch de Bësch komm.

Domat ginn ech gläichzäiteg dann och den Accord vun der gréngrer Fraktioun a soenlech schonn erëm Merci fir d'Nolauschteren.

► **Une voix.** - Très bien!

► **M. Mars Di Bartolomeo, Président.** - Merci der Madame Lorsché. Dat war eng punktgenue Landung. Och wann d'Zäit virdru rout gewisen huet, war se nach am Gréngen.

(Brouhaha)

Ech soenlech Merci.

An deen éischte Riedner ass den Här Serge Wilmes.

Discussion générale

► **M. Serge Wilmes (CSV).** - Här President, léif Kolleginnen a Kollegen, fir d'Éischt villmools Merci der Madame Lorsché fir hire Rapport. Si huet genau beschriwwen, ëm wat et hei geet, an huet déi wichtegst Punkte genannt. Fir eis ass et e wichtege Projet de loi, well en effektiv derfir suert, datt, wann een am Ausland eng Infraktioun mécht am Verkéier respektiv wann heiheem ebe Leit, déi net vu Lëtzebuerg sinn, eng Infraktioun zu Lëtzebuerg maachen am Verkéier, een dann dee Moment och bestrooft gëtt, datt mer u sech also och déi

Informatiounen kënne kréien, fir eben d'Infraktioun feststellen a fir och d'Infraktioun kënnen dann ze sanktionéieren.

Wichtig ass awer ze ënnersträichen, wat d'Madame Rapportrice jo och gemaach huet, datt et sech hei ëm d'Ëmsetze vun enger Direktiv handelt, awer datt déi Direktiv net virgesäit, datt mer elo géife Sanktiounen respektiv Infraktiounen harmoniséieren. Also, et ass net en Harmonisatiounsprozess. An all Land bleiwe weiderhin déi Sanktiounen an och déi Infraktiounen bestoen, déi bis elo an deene Legislatiounen bestanen hunn.

Zur Direktiv awer nach: Am Mee vun deem Joer, do huet den Europäesche Gerichtshaff déi Direktiv annulléiert, well se sech op e falschen Artikel vum europäeschen Traité gestäipt huet, wat dann natierlech dozou féiert, datt dës Gesetz zwar ka gestëmmt ginn, mä datt et awer trotzdem sech op eng Direktiv stäipt, déi net méi en vigueur ass. Den Europäesche Gerichtshaff huet zwar gesot, datt hir Effeten nach während engem Joer kënne gëllen, datt mer also nach ëmmer eng legal Basis domadder hunn, mä trotz allem wäert se jo da geännert ginn. An d'Madame Rapportrice huet eng wichteg Informatioun matbruecht, nämlech datt déi Direktiv amgaangen ass, geännert ze ginn.

Elo wéilt mer just gäre wëssen als CSV-Fraktioun, ob scho méi Informatiounen doleien, a wéi eng Richtung datt déi wäert geännert ginn. Well wa se jo esou geännert gëtt, datt mir mussen herno nach eng Kéier e Gesetzesprojet änneren, da wär et interessant ze wëssen, op wéi enge Punkten dann déi substanzuell Ännerung wäerte kommen. Soss bräichte mer jo net méi dee Gesetzesprojet nach eng Kéier ze änneren.

Eng aner Fro, déi och bestoe bleift oder déi am Raum ass oder déi een nach vläicht eng Kéier ka soen, ass déi, ob mer net hätte vläicht solle waarden dann einfach, bis datt déi Direktiv da geännert ginn ass, ier mer dann dës Gesetzesprojet géife stëmmen. Bon, den Här Minister kann eis herno nach eng Kéier dann op deenen dote Punkten eng Äntwert ginn.

Soss, ënnert dem Stréch, si mir fir dës Gesetzesprojet, mengen ech, well et wichtig ass, datt, wann een an dem Ausland eng Infraktioun mécht, wann ech am Verkéier géint de Code de la route am Ausland verstoussen, respektiv ee bei eis dat mécht, datt dann och awer kënnen déi Sanktiounen an deem Moment geholl ginn, déi een da verdéngt, well et kann ee jo net einfach esou sech jo de Batti stellen. Et muss ee jo dann och kënnen dee Moment seng Strofe kréien.

Dofir si mer da fir dës Gesetzesprojet. Ech ginnlech dann den Accord vun der CSV-Fraktioun.

Merci.

► **Plusieurs voix.** - Très bien!

► **M. Mars Di Bartolomeo, Président.** - Merci och dem Här Wilmes. Nächste Riedner ass den Här Roger Negri.

► **M. Roger Negri (LSAP).** - Villmools Merci, Här President. Dir Dammen an Dir Hären, ech wëll der Rapportrice, der Madame Josée Lorsché, e grouse Merci soe fir hir exzellente Rapporten a ginn domadder och den Accord vun eiser Fraktioun.

Merci.

► **M. Mars Di Bartolomeo, Président.** - Merci dem Här Negri. Dann den Här Gusty Graas.

► **M. Gusty Graas (DP).** - Här President, Dir Dammen an Dir Hären, laut dem Statec haten 1970 op eise Stroossen 132 Leit hiert Liewe verluer. Dat war u sech bis haut déi héchsten Zuel. 2012 waren et der 34, a leider weist d'Tendenz vun deem Joer erëm no uewen. An Europa stierwen all Dag an der Moyenne 70 Leit op eise Stroossen. 2011 waren dat der am Ganze 34.000, wéi een am „Annual Statistical Report“ noliese kann. Am schlémmste gesäit d'Situatioun a Rumänien, Polen a Bulgarien aus. D'EU-Kommissioun huet allerdéngs elo e Programm opgesat, laut deem se wëllt da bis 2020 déi ganz Problematik vun den Accidenter ëm d'Halschecht reduzéieren. Tëscht 2010 an 2013 ass och schonn e Réckgang vu 17% feststellen.

Mir hunn eis jo praktesch dru gewinnt, datt all Dag Accidenter geschéien, schwéier Accidenter, oft leider mat déidlechem Ausgang. An et vergeet jo wierklech keen Dag, wou net eng Heedewull vun Accidenter op eise Stroosse passéieren. D'Hauptursache sinn och bekannt: Dat si gréisstendeels Vitesse an Alkohol. Dofir ass et wichtig, datt déi gesetzlech Dispositiounen permanent och ugepasst ginn.

Et ass kloer, et ass keen, dee wëllt ëmmer zousätzlech repressiv Moosname fuerderen. Mä wann een awer gesäit, wéi verschidde Leit sech am Stroosseverkéier verhalten, da kënnt mat

Sécherheet de Législateur net derlaanscht, fir trotzdem permanent Adaptatiounen virzehuelen. Well wa mer déi vill Sensibilisierungscampagnë kucken, déi gutt gemengte Campagnen, da mussen mer awer op där anerer Säit och feststellen, datt se oft weenig Resonanz hunn. Mam Resultat, datt een, obwuel ee vläicht gären Auto fiert, awer oft munchmol d'Loscht dorunner verléiert.

Elo gëtt duerch dat neit Gesetz hei dann och d'Méiglechkeet geschafen, datt een, wéi gesot, wann een eng Infraktioun an engem aneren europäesche Stat mécht, dann no deem Recht och kann...

► **M. Mars Di Bartolomeo, Président.** - Wann ech gelift, lauschtert dem Riedner no!

► **M. Gusty Graas (DP).** - ...sanktionéiert ginn. Déi Direktiv, déi berëfft sech jo hei virun allem op grav Virfäll. Well grav ass et mat Sécherheet, wann een duerch Rout fiert. Grav ass et, wann een ënner Alkoholafloss fiert. A grav ass et mat Sécherheet och, wann een d'Vitesse-limite net respektéiert. Spéitstens wa mir hei zu Lëtzebuerg d'Gesetz iwwert d'Afféiere vun de Radare wäerte stëmmen, da wäert natierlech déi Dispositioun hei nach vill méi u Gewicht gewannen.

Et ass natierlech an deem ganzen Dossier hei elo eng juristesche Onkloerheet, op déi ech elo net aginn. Ech mengen, d'Madame Lorsché huet dat am Detail gemaach. Ech profitéieren elo vun der Geleeënheet, fir hir Merci ze soe fir hire Schrëttlechen a mëndleche Rapport. Mä trotzdem, an dat ass jo hei och ënnerstrach ginn, kënne mer awer zu deem Zäitpunkt dës Direktiv hei stëmmen, wuel wëssend, datt mer natierlech nach eng Adaptatioun nach eng Kéier mussen virhuelen.

Här President, Dir Dammen an Dir Hären, et sinn u sech zwee Aspekter, déi aus deem Text hei kënnen erausgestrach ginn: éischtens natierlech d'Vermëttlung hei vu perséinlechen Daten iwwert den EUCARIS-Traité, dee mer op dëser Plaz den 28. Januar 2004 gestëmmt hatten. Ech wëll och drun erënneren, datt schonn 1993 e Projet pilote ausgeschafft gi war, wat d'Vermëttlung vun Donnéeën ubelaangt um Niveau vu Benelux. Natierlech muss ee sech d'Fro stellen, ob och duerch dës Dispositiounen den Dateschutz optimal garantéiert ass. Mir mengen allerdéngs, datt deen néidege juristesche Kader heifir gesat gëtt, fir datt eben déi Garantie och kann dee Moment zrëckbehale ginn.

D'Leit hu jo - an och dat soll awer hei ënnerstrach ginn - awer och d'Recht, fir iwwert den Traitement vun hiren Donnéeën permanent informéiert ze ginn, an dat och op Basis vum modifizéierte Gesetz vum 2. August 2002 iwwert den Dateschutz. Wa mer dat villt Leed considéréieren, wat op eise Stroossen, wéi gesot, all Dag passéiert, ech mengen, da muss een och déi Fro vum Dateschutz an deem Kontext hei jiddefalls dach relativéieren.

Et ass dann en zweeten Aspekt, deen een hei soll ënnersträichen, dat ass awer virun allem och déi europäesch Zesummenaarbecht, e Renforcement vun där Zesummenaarbecht. Dat ass u sech och e flott Beispill, wéi d'Europäesch Unioun sech awer och positiv kann duerstellen, a besonnesch an enger Zäit, wou jo leider u sech d'Ënnerstëtzung fir d'Iddi vun engem gemeinsamen Europa net onbedéngt ganz staark ass, ganz au contraire, wat wierklech ze bedauern ass! Do ass et wichtig, datt och esou „kleng Gesetzer“ - tëschtent Guillemts - awer trotzdem derzou bäidroen sollen, fir u sech deen europäesche Geescht nach eng Kéier hei ze ënnersträichen, wat jo awer vill Virdeeler och fir d'Bierger ka mat sech bréngen.

Et muss een an deem Kontext jo natierlech och op dee gemeinsame Centre iwwert d'Zesummenaarbecht tëschtent der Polizei an der Douane hiweisen, dee mer jo och hei duerch d'Gesetz vum leschten 28. Abrëll geschafen hatten. Et ass dat ouni Zweifel och e gelongene Projet vun enger grenziwwerschreidender Zesummenaarbecht.

Här President, Dir Dammen an Dir Hären, ze bedauern ass vläicht de Moment, datt déi Infraktioun, déi een hei zu Lëtzebuerg respektiv an engem anere Land mécht, keng Inzidenz direkt op de Punktführerschäin huet. Ech soen awer: nach net huet, well ech ginn dervun aus, datt um europäesche Plang awer och do wäerten déi néideg Schrëtt ënnerholl ginn, fir datt, wéi gesot, Gesetzesiwwerschreidungen awer och herno kënne sanktionéiert ginn duerch e Verloscht um Niveau vum Punktführerschäin.

Ze bedauern ass och vläicht, datt mer technesch gekuckt nach net esou wäit sinn, datt eben och den Ofstand, dee jo muss gehale ginn - a besonnesch op den Autobunnen ass dat e grouse Problem -, datt dat nach net iwwert deen heite Wee ka sanktionéiert ginn. Mä iwwert d'Gesetz vun de Radaren, wat mer

jo dann och nach wäerten an deenen nächste Méint eng Kéier hei stëmmen, ass jo och virgesinn, datt dat kann an Zukunft geahndet ginn, wann een net dee Mindestofstand respektéiert.

Jiddefalls ass dat hei ouni Zweifel aus der Siicht vun der Demokratescher Partei e wichtegt Gesetz, wat mer stëmmen. Ech mengen, et reit sech och e bësselchen an déi Strategie an, déi de Minister jo gëschter hei ugekënnegt huet vu senger „Vision zéro“. An dat ass eppes, wat een nëmme kann ënnerstëtzen! Ech mengen, mir hu vill ze vill Problemer um Niveau vum Stroosseverkéier. Déi mussen einfach bekämpft ginn, leider eben, wéi gesot, och duerch zousätzlech legislativ Moosnamen. Nach eng Kéier: Mir sinn déi Lescht, déi fir absolut Repressioun sinn. Mä wann et eben net aneschters geet, da muss awer och hei de Législateur seng Verantwortung iwwerhuelen.

A vu datt de President mech drop hiweist, datt d'Zäit schonn ofgelaf ass, soen echlech Merci fir d'Nolauschteren a gi selbstverständlech och d'Zoustëmmung vun der Demokratescher Partei.

► **M. Mars Di Bartolomeo, Président.** - Merci dem Här Graas. Nächste Riedner ass den Här Fernand Kartheiser.

► **M. Fernand Kartheiser (ADR).** - Här President, Dir Dammen an Dir Hären, e Gesetz, wat d'Rechts-, also wat d'Verkéierssécherheet soll verstärken, ass natierlech a priori eng ganz gutt Saach. Mä an deem Fall hu mir dat Gefill, datt mer Verkéierssécherheet austausche géint e Verloscht u Rechtssécherheet. An dat ass sécherkee Wee, dee mir wëlle matgoen. Den Här Graas huet och elo gesot, wou e fir d'Demokratesch Partei geschwat huet, et misst ee souguer d'Datesécherheet relativéieren an deem Kontext - och dat stelle mir a Fro!

Wat stelle mir hei fest? An ech soen der Madame Lorsché Merci fir hire ganz komplette Rapport, mä dee Rapport werft eng ganz Rei vu Froen op. Eng éischt Fro ass déi Fro vun der Base légale vun dëser Direktiv. Déi ass nach gutt bis de Mee, well den Europäesche Gerichtshaff se jo gekippt huet, an d'Effeten dovunner sinn nach gutt bis de Mee 2015. Et ass net ze verstoen, datt mer dat elo hei nach an där Form ëmsetzen, ëmsou méi, datt mer souguer an deem Gesetz soen, mir wëllen elo keng speziell Polizeiservicer domadder beoptragen, well mer dann d'Gesetz missten änneren. A mir mussen dat Gesetz souwiso nach eng Kéier iwwerschaffen, wann eng nei Direktiv kënnt, well dat heite keng Base légale méi huet.

Dat ass sécher net de richtege Wee gewiescht. Wat mer hätte solle maachen an där Zäit, dat ass, déi Rahmbedéngunge verbessern, déi mer brauchen, fir dës Gesetz wierklech optimal ëmzesetzen, an notament am Beräich vun der Datesécherheet: déi Décision-cadre vum Conseil Justice an Affaires intérieures vun 2008. Mir hätte sollen och kucken, wéi d'Leit en Accès direct kënne kréien op déi Donnéeën, déi ofgefrot ginn. Déi Prozedur, déi elo virgesinn ass iwwert den Artikel 17 Paragraph 2 vum Gesetz vum 2. August 2002 géint keng Zefriddenheet, well dee Gremium, deen do virgesinn ass, iwwerhaupt net déi Moyenen huet, fir mat deenen Ufroen, déi op dee Gremium zoukommen, kënnen eens ze ginn.

Mir sinn och als ADR net iwwerzeegt, datt mer sollten déi sougenannten „dynamesch Ëmsetzung“ mat vollzéien, déi eigentlech just doranner besteet, datt herno praktesch an engem Novollzuch dann ouni Aschtaltung vum Lëtzeburger Parlament weider Dispositiounen mussen a Lëtzeburger Recht iwwerholl ginn. Och dat ass net am Sënn vum Respekt virun der Souveränitéit vun de Memberstaten.

Ech wëll och eng ganz Rei aner Problemer opwerfen, déi hei mat deem Gesetz zesummenhängen. Net nëmmen, datt rechtlech Onsécherheete sinn, wat iwwerhaupt d'Base légale ugeet, mä et gëtt nach eng Rei praktesch Problemer.

Éischtens wëll ech emol soen, datt et eng Dérive gëtt vun deem Processus legislativ an Europa, déi ee sech emol muss virun Ae féieren.

Viru Joren hu mer jo iwwert den Traité de Prüm hei e Rechtsinstrument geschafen, dat geduecht war, fir Informationsaustausch ze erméiglechen, fir géint Terrorismus oder organisiert Kriminalitéit virzegoen. Haut benotze mer dee Kader, dee mer deemools geschafen hunn, fir Donnéeën iwwer Leit nozefroen, déi vläicht mam Motorrad op enger griichescher Insel gefuer sinn ouni Helm! Dat ass net de Sënn gewiescht vun deem, wat mer ursprüngelech geschafen hunn. Mä et ass rechtlech interessant, fir ze gesinn, wann een eng Dier op-



mécht am Dateschutz, wou dat no e puer Joer kann hiféieren!

Ech erënneren drun, datt d'Staten u sech net nëmmen Ziler hu vu Verkéierssécherheet an esou weider, mä si hunn och eng Flicht, eng konsularesch Flicht vum Schutz vun hire Stats-bierger, déi een dann och an dësem Zesummenhang net därëf aus den Ae verléieren. Wa mer esou eppes schafe wéi dat, wat mer hei diskutéieren, si mer net sécher, datt et kee Mëssbrauch gëtt an den Nofroe vun anere State géintiwwer deenen Donnéeën, déi hei an eisen Datebanke leien.

Et gëtt an dëser Direktiv keng Méiglechkeet, keng kloer Rechtsweeër, fir sech ze wieren. Et gëtt just de Verweis op Rechtsweeër, déi an deem Land eventuell existéieren, vun deem dann e Brëif kënnt. Mä et gëtt keng direkt Méiglechkeet, Asproch ze erhiewen oder Informatiounen ze hu fir déi Persoun hei am Land, déi da vun engem Offroe vun Donnéeë beträff ass.

Da muss een och kucken, déi Leit, déi Autoe verlounen hei am Land, mat wéi enger Rechts-situatioun déi eventuell dann ze dinn hunn. Well de Propriétaire vum Auto, also eng Entreprisé, déi Autoe verlount, ass jo net den Délinquant effectif. Wéi eng Problemer sinn dann domadder verbonnen, wann elo en Dän, dee jo elo am Abléck op jidde Fall emol net am Domaine d'application vun där Direktiv ass, hei en Auto lount an duerno an England geet. Dann ass dat eng rechtlech bal onméiglech Situatioun. U wem bleift dann de Protokoll hänken, deen aus dem Ausland geschéckt gëtt? Wéi eng Rechtsgarantien huet déi Entreprisé, fir sech kënnen effikass ze wieren? Et gëtt keng maximal Délaien. Et gëtt keng kloer Prozeduren an deem Fall.

Et sinn also net nëmme Froe vum Dateschutz, déi hei zur Sprooch stinn, mä einfach och Froen iwwert d'Effikassitéit iwwerhaapt vun deenen Dispositiounen, déi hei proposéiert ginn.

Mat all deene Considératiounen..., mir kéinten der nach vill derbäi maachen, iwwert d'Sproochen, iwwer aner Prozeduren, iwwert d'Implikatiounen zum Beispill op de Casier judiciaire hei zu Lëtzebuerg, wann esou Saachen am Ausland sinn. Et ass souguer proposéiert ginn, datt dat soll Implikatiounen op de Punkteführerschäin hunn. Wéi ass et da mam Casier judiciaire hei zu Lëtzebuerg, wann am Ausland esou eng Infraktioun constatéiert gëtt? Alles dat si Froen, déi eigentlech an enger Direktiv, déi gutt gemengt ass, fir méi Verkéierssécherheet ze bréngen, awer esou vill Rechtsónsécherheet bréngen, datt mir net mat op dee Wee ginn, fir dat hei ze stëmmen.

Mir hätte sollen, wann elo eng nei Direktiv verhandelt gëtt, an dat ass jo am Abléck de Fall, vun där Zäit profitéieren, fir ze kucken, fir déi esou ze verbesseren, datt mer kënnen Rechtsónsécherheeten aus dem Wee raumen an den Dateschutz vun de Leit, déi kënnen beträff sinn, verbesseren. Dat wär dee Wee gewiescht, deen d'ADR proposéiert hätt.

Ech soen lech Merci.

► **M. Gast Gibéryen** (ADR).- Ganz gutt!

► **M. Mars Di Bartolomeo**, *Président*.- Merci och dem Här Kartheiser. Leschte Riedner ass den Här Justin Turpel.

► **M. Justin Turpel** (déi Lénk).- Et ass ganz kloer, datt d'Repressioun ee Bestanddeel muss si vun der Verkéierssécherheet. Ech wäert herno bei der Interventioun iwwert d'N7 nach do-robbler zrëckkommen. Trotzdem stëmmen mir géint dee Projet hei, haaptsächlech aus der Ursach, well en net primär garantéiert, datt déi Repressioun, déi noutwendeg ass, och wirklech funktionéiert, mä och, well den Dateschutz, deen domadder verbonnen ass, net garantéiert ass.

Ech ginn net méi an op déi Froen, déi schonn opgeworf gi sinn iwwert d'Gültgkeet vum Gesetz, wat mer hei stëmmen, datt dat den 9. Mee 2015 (veuillez lire: de 6. Mee 2015) seng Gültgkeet verléiert, well d'Direktiv nëmmen op zwoelf Méint nom Uerteel vum Europäesche Gerichtshaff verlängert ginn ass. Wat iwwregens e ganz bizaart Uerteel war, well et war e Prozess vun der Kommissioun géint d'Parlament an de Conseil. Dat ass trotzdem ganz erstaunlech.

Mä n'empêche, datt d'Kommissioun hei gewonnen huet géint d'Parlament a géint de Conseil, wat d'Base juridique ugeet vum Artikel 87 respektiv 91 vum Traité, a gesot huet, datt weinst dem Fonctionnement, fir datt et awer ka weiderfonctionnéieren, d'Gesetz nach zwoelf Méint kann zielen.

Mir müssen eis also bewosst sinn, datt mer déi Gesetzesännerung hei musse virum 6. Mee 2015 ëmsetzen. An d'Fro, déi ech dem Minister konkret stellen, ass: Wann deen Délai net ka respektéiert ginn, wat heescht dat fir dat heite Gesetz?

Wat eis stéiert, dat ass déi Vermëschung vun der Coopération transfrontalière am Kampf géint den Terrorismus an d'Kriminalitéit mat dem Austausch vun Informatiounen iwwert d'Infraktiounen am Verkéier. An déi Vermëschung ass konstant an deem Gesetz hei dran.

Iwwert d'Coopération transfrontalière hu mer jo scho geschwat den 28. Abrëll an der Chamber hei, wou eis Fraktioun déi eenzeg war, déi géint dat Gesetz do gestëmmt huet, well och dat Gesetz, wat den Dateschutz ugeet, grouss Lacunnen opweist, awer ënnert dem Prétexte vum Kampf géint den Terrorismus haut villes méiglech ass, wat eigentlech net därft sinn.

Deemools ass schonn drop higewise ginn, datt d'Dateschutzkommissiounen a Europa gesot hunn, si wiere beim Zustanekomme vun deenen Accorden, wou et awer ëm wichteg Dateschutzbestëmmunge geet, emol net ëm hiren Avis gefrot ginn.

Wat elo hei als Dateschutz am Gesetz drasteet, ass u sech kontradiktoresch! Ech wëll emol einfach dorobber hiweisen, wéi kontradiktoresch datt et ass.

D'Gesetz seet an der Essenz: Mir baséieren eis engersäits op d'Artikele 24 bis 32 vun der Direktiv vun 2008 iwwert den Dateschutz, an anerersäits ass zu Lëtzebuerg zoustänneg d'Autorité de contrôle, laut Artikel 17. Wat kann d'Autorité de contrôle laut Artikel 17 maachen? Et ass d'nämlech wéi bei der SREL-Diskussioun, well et geet ëm Fichier-règlementéen: Si kann higoen, kucken, wann ee reklaméiert, ob déi Donnéeë korrekt sinn. A wa se net korrekt sinn, ka se se just läsche loosser. A wa se da geläscht sinn, informéiert se dee Betreffenden, de Fichier wier elo an der Rei.

Dat ass awer eng Dispositioun, dat ass awer eng Praxis, déi total konträr zum informationelle Selbstbestimmungsrecht vum Bierger ass! De Bierger, dee muss wëssen, wat iwwer hie wou gespäichert ginn ass a wat domadder geschitt. An dowéinst seet jo och den Artikel 28 vun där Direktiv, op déi sech hei beruff gëtt, datt, wann d'Läschen dem Betroffene kéint Problemer stellen, dann därft net geläscht ginn. Also beruffe mer eis hei op engersäits eng Direktiv, déi seet, et därft net geläscht ginn, a mir ginn d'Kompetenz un eng Autorité de contrôle nationale, déi keen anere Moyen huet, wéi ze läschen.

Dat ass einfach eng Aart a Weis, wéi een net mam Dateschutz kann ëmgoen. An et ass och d'Ursach, aus där mir, weinst där mir hei géint dat Gesetz stëmmen.

Derbäi kënnt, datt effektiv - d'Annex I vun der Direktiv - hei am Gesetz drasteet, datt, wann déi ännert, da wier se automatesch fir eis mat geännert. A wourëms geet et an der Annex I? Ma et geet ëm déi Donnéeën, déi ee kann ofruffen. Et geet ëm déi Donnéeën, déi am Fichier dra sinn. An ech fannen, dat ass esou eng wichteg Saach, datt een net einfach kann higoen a soen: Wann déi Donnéeën änneren, da si se fir eis automatesch mat geännert. Mä da misst een effektiv doriwwer diskutéieren an ofstëmmen.

Ënnert dem Stréch menge mir also, datt et scho wichtig ass, fir Informationsaustausch ze hunn iwwer Infraktiounen, esou wéi mer jo och ee brächten iwwer Infraktiounen, wat d'Steierhannerzéiung ugeet. Mä do gëtt net esou vill driwwer diskutéiert. Do hu mer nach kee Projet de loi an deem Sënn virleien. Mir mengen, datt dat misst méiglech sinn. Mä net op déi doten Aart a Weis, wou den Dateschutz esou schlecht respektéiert gëtt, wéi dat an dësem Fall de Fall ass!

Merci.

► **M. Mars Di Bartolomeo**, *Président*.- Domat wäere mer um Enn vun der Diskussioun an d'Wuert huet den Nohaltegkeets- an Transportminister.

Prise de position du Gouvernement

► **M. François Bausch**, *Ministre du Développement durable et des Infrastructures*.- Här President, fir d'Éischt emol Merci och hei der Rapporteuse fir den ausféierleche Rapport an och all de Riedner fir hire Beitrag. Ech muss soen, d'Diskussioun, déi elo zum Schluss hei gefouert ginn ass iwwert den Dateschutz, ass sécherlech eng berechtigt.

Ech wëll déi awer elo net méi hei am Fong féieren, well ech mengen, datt awer an den Diskussiounen, déi an der Kommissioun waren, eng Rei Saache konnten et enträkt gi vun deem, wat elo hei behaupt ginn ass. D'autant plus, wou jo och, wann ech de Modell kucken,

net genuch Zäit wär elo, fir dat am Detail elo hei ze diskutéieren. Ech sinn awer der Meinung, datt dat, esou wéi et hei duergestallt gëtt, net berechtigt ass, soen ech ganz kloer!

Et geet hei drëms, datt mer déi Direktiv - an dat ass d'Fro, déi jo gestallt ginn ass: Firwat setze mer déi iwwerhaapt nach ëm? -, datt mer se müssen ëmsetzen, well den Délai war de 7. November schonn ofgelaf an et leeft eng Procédure d'infraction géint Lëtzebuerg. A mir hu wierklech nach Zäit maximal bis..., also mir misste se eigentlech schonn ëmgesat hunn. Duerfir sinn ech frou, datt mer et elo nach hei stëmme virun Enn des Joers.

Elo kann ee sech d'Fro stellen: Wat fir e Sënn mécht dat? Gëtt elo alles iwwerschafft? Neen, ech kann lech soen, wat iwwerschafft gëtt, dat ass op Basis och vun enger Décisioun, déi de Conseil „Transport“ den 8. Oktober bei enger Orientation-générales-Debat geholl huet, datt d'Base légale iwwerschafft gëtt. Dat heescht, de Moment geet et hei jo ëm d'Coopération police judiciaire (veuillez lire: d'Coopération policière et judiciaire), an et gëtt verschobe vun do eriwuer zum Transport.

Dat war och d'Haaptkritik, déi gemaach ginn ass beim Arrêt vun der Cour. Et ass net, datt déi ganz Direktiv hei komplett a Fro gestallt ginn ass. Et ass haaptsächlech d'Base légale, déi a Fro gestallt ginn ass. An et ass och dat, wat wäert geschéien. Dat heescht am Kloertext: Mir wäerte keng substanzuell Modifikatiounen musse maachen herno um Text, wéi en hei elo ugeholl gëtt, mä d'Base légale gëtt wahrscheinlech herno geännert, wa mer déi nei Direktiv hunn, déi relativ séier wäert kommen. Well wéi gesot, et huet keen an Europa Intérêt, datt mer hei keng Base légale méi hunn. Déi hei leeft jo nach bis de Mee d'nächst Joer. An duerfir wäert dat relativ séier, wéi gesot, goen.

Ech sinn der Meinung, datt mer deen Échange hei brauchen. Well ech soen lech just: Wa mer dat net hunn, da kënnen mer alles vergiesse vun Infraktiounen sanktionéieren a Mechanismen an all Méiglechkeeten, déi mer eis ginn, fir méi Verkéierssécherheet ze kréien!

Den Här Graas huet et virdru beschriwwen: De Bilan, dee mer hunn, net nëmmen zu Lëtzebuerg, mä generell an Europa, ass net terribel am Moment. A wa mer eis déi do Méiglechkeet net ginn, da kënnen mir vill Mesuren ergreifen, fir derfir ze suergen, datt mer méi Verkéierssécherheet kréien, datt mer d'Leit zu méi Disziplin kréien, mä dann notze se eis näischt, well effektiv jiddwereen an deem anere Land engem eng laang Nues ka maachen a keen effektiv kann, jee nodeem, wou en dann immatrikuléiert ass, sanktionéiert ginn.

Duerfir sinn ech der Meinung, datt dat heiten eng wichteg Direktiv ass. An, wéi gesot, mir brauchen un der Substanz herno näischt ze änneren, mä d'Base légale gëtt geännert. An ech ginn dovun aus, datt déi Direktiv relativ séier wäert fäerdeggestallt ginn, soudatt mer déi och relativ séier also wäerten ëmsetzen, wa se da geännert gëtt, hei am Parlament.

Merci.

► **M. Mars Di Bartolomeo**, *Président*.- Merci och dem Här Minister. A mir kënnen direkt zur Ofstëmmung iwwert de Projet 6566 iwwergoen.

Vote sur l'ensemble du projet de loi 6566 et dispense du second vote constitutionnel

De Vote fänt un. D'Procuratiounen. D'Ofstëmmung ass eriwuer.

De Projet de loi 6566 ass ugeholl mat 55 Jo-Stëmmen, bei 5 Nee-Stëmmen.

Ont voté oui: Mmes Diane Adehm, Sylvie Andrich-Duval, Nancy Arendt (par M. Laurent Mosar), MM. Emile Eicher, Félix Eischen, Léon Gloden (par Mme Françoise Hetto-Gaasch), Jean-Marie Halsdorf, Mmes Martine Hansen, Françoise Hetto-Gaasch, MM. Aly Kaes, Marc Lies, Mme Martine Mergen, M. Paul-Henri Meyers, Mme Octavie Modert, MM. Laurent Mosar, Marcel Oberweis, Gilles Roth, Marco Schank (par M. Claude Wiseler), Marc Spautz (par Mme Octavie Modert), Serge Wilmes, Claude Wiseler, Michel Wolter et Laurent Zeimet (par M. Serge Wilmes);

MM. Marc Angel, Frank Arndt, Alex Bodry (par M. Roger Negri), Mmes Taina Bofferdig, Tess Burton, M. Yves Cruchten, Mme Claudia Dall'Agnol, MM. Mars Di Bartolomeo, Georges Engel, Franz Fayot, Claude Haagen, Mme Cécile Hemmen et M. Roger Negri;

MM. Guy Arendt, André Bauler, Gilles Baum, Mme Simone Beissel, M. Eugène Berger, Mme Anne Brasseur (par M. Lex Delles), M. Lex Delles, Mme Joëlle Elvinger, MM. Gusty Graas, Max Hahn, Alexander Krieps (par M. Eugène Berger), Edy Mertens et Mme Lydie Polfer;

MM. Claude Adam, Gérard Anzia, Henri Kox (par Mme Viviane Loschetter), Mmes Josée Lorsché, Viviane Loschetter et M. Roberto Traversini.

Ont voté non: MM. Gast Gibéryen, Fernand Kartheiser et Roy Reding (par M. Fernand Kartheiser);

MM. Justin Turpel et Serge Urbany.

Ass d'Chamber bereet, d'Dispens vum zweete verfassungsméisge Vote ze ginn?

(Assentiment)

Merci. Dann ass dat esou décidéiert.

Mir géifen dann elo direkt zum nächste Punkt iwwergoen. An dat ass d'Interpellatioun vum Här Aly Kaes iwwert d'N7 a méi prezis iwwert d'Sektioun Fridhaff-Schmëtt. Den Här Kaes huet d'Wuert.

8. Interpellation de M. Aly Kaes sur la N7/E421 sur la section Fridhaff-Schmëtt

Exposé

► **M. Aly Kaes** (CSV), *interpellateur*.- Här President, Dir Dammen an Dir Hären, zum Zäitpunkt, wou ech dës Interpellatioun ugefrot hunn, war d'N7 am Géigendeel zu haut net gradesou an der Aktualitéit. Meng Demande war eng Reaktioun op den Dépôt vun de Plansectoriellen, déi dee Moment an d'Prozedur gaange sinn an déi, wéi mer mëttlerweil jo wëssen, vun...

(Incident technique)

...zrëckgezu gi sinn. Et war eng Reaktioun op deen, an eisen Aen, onkomplette Plan sectoriel «Transports», wou eng vun den Haaptverkéiersachsen aus dem Land, d'Achs vum Norden erof an den Zentrum, net déi Beuechtung a Prioritéit bei der Regierung fonnt huet, déi dës Strooss, an eisen Aen, eigentlech misst hunn. Duerfir, wéi gesot, hunn ech dës Interpellatioun ugefrot.

Et ass also net, wéi vläicht Verschiddener mengen, prioritär weinst där rezenter schwaarzer Serie vun Accidenter op der N7. Et geet och definitiv net ëm mech, wéi dat Verschiddener ëmmer erëm heibannen an och dobausse mengen, wann hei an der Chamber oder op anere Plazen iwwert d'Streck tëschent dem Fridhaff an der Wämperhaart diskutéiert gëtt.

Ech wollt u sech an deem Kontext dann och eng Kéier kloer soen, dass, jo, wann ech en Egoist wier a wann ech just géif no mir kucken, da wier et mer eigentlech - an ech betounen, eigentlech - egal, wéi et ëm d'Sécherheet op dëser N7 op der Streck bestallt ass.

Well déi Wéinegst wëssen dat vläicht: Ech fuere vun deenen 43 Kilometer, déi dës Streck laang ass, just de Wee vum Rond-point Fridhaff bis bei déi éischt Sortie. Dat si genau 1,6 km. Da sinn ech erof vun där Strooss. Et kéint mer, wéi ech scho gesot hunn, dann eigentlech egal sinn, wat hannendrun nach esou geschitt.

Mä, Här President, Dir Dammen an Dir Hären, et ass mer iwwerhaapt net egal! Et geet mer eenzeg an eleng dorëms, fir d'Verkéierssécherheet fir all Bierger aus dësem Land souwéi och fir déi sëllec auslännesch Chauffeuren, déi op dëser Streck ënnerwee sinn, nohalteg ze verbesseren. An dofir setzen ech mech zënter Joren an.

Elo kënnt dann natierlech direkt de Virwurf, deen een alt ëmmer gären am Kontext vun der N7 ze héiere kritt: dass d'CSV jo laang genuch um Rudder war, dass se laang genuch Zäit hat, fir d'Sécherheitsproblemer op dëser Streck ze behiewen.

(Brouhaha)

Dat ass sécherlech eng berechtigt Kritik. An ech wier dee Leschten, deen dat net versteet. Ech hat duerfir och mam fréiere Minister a mat mengem aktuelle Fraktiounsprésident déi eng oder déi aner ganz intensiv Diskussioun.

► **Plusieurs voix**.- Aah!

► **M. Aly Kaes** (CSV), *interpellateur*.- Mä...

(Interruption)

Waart schéin!

...dës Diskussiounen waren awer schlussendlech net ëmoss. Et ass nämlech esou, dass den deemolege Minister Claude Wiseler d'accord war, dee véierspuregen Ausbau vum integraler N7 an den Avant-projet vum Plan sectoriel «Transports» anzeschreien. Jo, domadder hätten d'Baggeren natierlech net direkt kënnen ufänke mat schaffen, mä et hätten awer déi Moossname kënnen getraff ginn, déi de Bau vun der N7 mëttelfristeg op véier Spure géifen erméiglechen, an zwar: e Gesamtkonzept dévelloppéieren, en Avant-projet maachen, Korridoren ausweisen an esou weider.

Vu dass den Avant-projet vum Plan sectoriel «Transports» vum 13. Juni 2013, vun deem ech eben hei schwätzen, net public ass, wëssen u sech déi mannste Leit, wat genee iwwert den